

4. Itna i cih Banghiam?

- a) Laisiangtho bulphuhte 1Cor. 13:1-13 1John 4:7-21 1John 3:1-24 1Pet. 4:8
Matt. 22:36-40 Eph. 3:17-19 Rom. 13:8-10

b) Itna i cih bang hiam?

"Itna in lungduai a, itna in migi hi. A engkei a, a kisial kei a, a kiasathei kei hi. A gamhtat kei hi, a ma ang sung ding bek zong lo in a heh baih kei a, tatkhiálnate a ciamteh kei hi. Itna in gitlohna a pakta kei a, ahihang in thutak ah a lungdam hi. Itna in a hu den hi, a muang den hi; a lam en den hi; a thuak kei kai den hi. Itna a lawh sam ngei kei hi. Ahihang in kamsang a thungennate a om na ah a bei ding hi. Paute a omna ah a dai ding hi." (1Cor. 13:4-8).

Thuciamthak sung a a kizangpha pen "itna" in 'agape' ahi hi. Christian hihna a om ma ciang dong a deihna tawmbek a kitheih bang in, Christian hihna ii om zia lak kam mal khat ahi hi, Hih pen kipum piak khiatna, kiim leh paam tung a kinga lo leh ang sung thei lo itna a lakkhia kammal hi. Pasion in hih kammal khiatna lahna in a Tapa Zeisu a kilawm lopi eite ading in a thuak ding leh a si ding in leitung ah hong sawl hi.

"Itna bang ahi hiam cih i theihna hih ahi hi. Zeisu Khazih in eite ading in a nuntakna hong kham hi. Tua bang in eite in i sanggamte ading in i nuntakna i kham ding kul hi." (1John 3:16).

"Ahihang in Pasion in eite hong it takpina hih bangin hong lak hi. Eite mawhnei i hih laitak in eite ading in Khazih a si hi." (Rom. 5:8)

"Itna hih ahi hi. Eite in Pasion i it cih na hi lo, amah in eite hong it a, i mawhnate a khuh nading kithoihna in a Tapa hong sawl ahi hi." (1Jn. 4:10). (Eph.2:4-5; John 3:16 zong en in).

Tua ban ah amah i it nading in Pasion in hong huh hi. Agape in a thuk mahmah itna pulak a, a kicing pa in kilawmna a nei ngiatlo khat a lunglut na, amaute sunga om a thupi itna pen a pia pa lam ah khangsakhi. Tua bang mah a ngah khate tungah hih itna zat khiat pahna, a pia pa a zon nop nading vua midangte huh ding lunggulhna ahi hi (A.E.Vine : Expository Dictionary). Thu dang in gen leng, Pasion in eite ngaihsutnate thusim lo in thuktak in hong it a, amah i it kik theih nading zong hong huh a, a dang Christiante zong hong it sak leh, leitung mi dangte mahmah ama kiang tunpih ding zah in ong itsak hi. Hih bang a Pasion it ding cih pen i nuntakna ah amah leh a lunggulhnate thupi koih penna tawh amah lungkimsakna ahi hi. I hihna khempeuh tawh Pasion it takpi ding pen thupiak khempeuh lakah a lianpen ahi hi (Mt. 22:36-40; Deu. 6:4-7)

c) Pasion i itna koici lah ding?

1. Pasion kua hiam cih thu hangin i lungdam ding ahi hi. Pa Pasion pen itna, mawhmai sakna, hehpihna, thumaanna leh dikna etc., Pasion ahi hi.
2. Eite ading hong sepsak sate hang in Pasion tungah lungdamna leh nuam nate pia thei hihang. Ama sep ding a akisam hetlo na lian pite eite ading hong sep sak a, a diak diak in a Tapa Zeisu hong sawlna leh amah leh amah hong kipulak na hi. Ama kumpi gam mi leh ama tate i hih theihnading in eite ading tampi hong bawl sak hi (1John 3:1)

3. Pasion i theihzawh ding lunggulh ding hihang. A diakdiak in ama kammal sim in i lungngaih na leh thungetna tawh amah tawh i kikhohkhop na tungtawn in...
4. Pasion a lungdamsak nuntakna tawh nungta thei hihang. Hih pen hibang in a tat leh kilakkhia takpi hi.
 - Ama ading a thupi nate eite ading thupisak ding (gentehna; Zeisu tawh kisun ding a, khantohna, khat leh khat itna kilahna, leh minam khempeuh Zeisu ading a nungzui suahsak ding a Zeisu hong sawlna tangtun sakna)
 - Ei le ei maw, leitungmaw, sunga Pasion lungkimsak a nuntak ding (1John 2:15-17)
 - Leitung ading Pasion vangik puak nopna hi in a diakdiak in thungetna ah (Matt. 6:9:10)
 - Pasion ading kipumpiakhiat nopna leh hong nget khiak leh na khempeuh nangawn piak nopna (Mark 12:41-44)
5. Pasion kammal leh a thupiakte man ding hi (Jn 14:15; Matt. 7:21-23; I Jn. 5:2-3).
6. Amah i it lam Pasion kiangah gen thei hihang: thu i nget teh, i pau teh, i phat teh, la i sak teh.
7. Pasion tungah kipumpiakna tawh i itna lakkhia thei hihang; tua khit teh ama omna khempeuh (Jn. 21:15-17).
8. I sanggamte leh i galte nangawm it ding hihang. Agape itna pen midangte hoihipen nading zon ding ngaihsutna hi.

"Eite in i sanggamte i itman in sihna pan paikhia in nun takna sungah i lutzo cih i thei hi. A itlo mi peuhmah sihna sungah a om lai hi."

"Mi khat peuh in neih leh lam nei in a sanggampa kisap lam thei napi a mah hehpih keileh bang cibang in a ma sungah Pasion itna om thei ding ahi hiam? Kong it tate aw, a thu le kamsiam bek tawh ki it lo in, gamtatna le thu tak in ki it ni?" (1John 3:17-18)

"Ahihang in ken kong gen in ah, na galte na it in, hong bawlsiate ading thu na ngetsak in" (Matt. 5:44). "John 13:34-35; Rom. 12:9-10; Gal.5:14; 1Pet. 4:8 te zong en in."

d) Itna pen thupi hi

Itna pen Pasion gam sunga cinna lakah a thupipen ahi hi. Na khempeuh hih theihna, mualte kikhinsakna, neih leh lamh khempeuh mizawngte piakna leh i upna hanga sih ngamna nangawn pen itna i neih keileh khiatna nei lo hi (1Cor.13:1-3). Thu theihna leh Khasiangtho letsongte pen thupi hi, ahizong in a tawpna ah na khempeuh kipholak dinga hih thute hong thupi lua nawn lo ding hi. Tua hi a, i nuntaknate leh i nasepnate hih thute tungah i siksah leh bangmah lo tawh om ding hihang. Banghang hiam cihleh hih nate bei mangin mangthang ding hi. Tuat pen naupang i hih lai a, nuam i sak leh i kisap naupang kimawlna nate bang hilel ding hi. Tuat pen khangcing sa pasalte ading kizat theihna om nawn lo hi. Eite in a kizanghthei zaw leh a gahpha zaw upna, lametna leh itna (a thupi penpen). a kipan a thupi zawte sungah i khantoh ding kisam hi. Itna pen Christian hihna ah sai kapna saithau tawh kibanga, cina damsakna leh mailam thugennate hilo hi. Itna pen bei ngei lo a, ahizong in a dang khempeuh mangthang ding hi. Khasiangtho letsongte pen Pasion itna lahkhiatna ding hi thei a ahizong in, eite in tua letsong bek ngaihsun in hong kipiakna a hang peuh mangngilh thei hihang. Letsongte pen Zeisu kiangah mite paipih nading leh mite tungah Pasion itna lah nading ahi hi (1Cor. 13:8-13). Laiiangtho sung a Khasiangtho letsongte genna mun peuhmah pen itna thu a gennate tawh khinkhai tawntung hi. Itna lo a vangliatna pen lauhuai ahihman in hih nihte ton khawm helhel hi.

Vangliatna pen it theih nading leh itna lah nading bek a hih kul hi. Itna pen a ciamteh, a sim ahi hi. Pasion leh midangte i itna pen Pasion na i sepna ah a nung pan a tha a pia a hanthawh a hih ding kism hi.

e) Itna in Khazih pumpi lenkhawm hi

Pasion itna pen Khazih pumpi ahi, Pawlpi a len khawm cement ahi hi. Ngaihsut siamna, thapiakna leh huaiham lohnate tawh hih nasep i sep ding kism hi. Eite sep khiatte bek hi lo, mite sepnate leh kampaute i thuhkikna ah zong i kidop ding thupi hi. Hih pen itna i sittelna hi. Pasion pen eite khialhnate ah a lungduai mah bang midangte khialhnate ah zong i lungduai ding hong deih hi. Midangte khialhnate tawh nang khialhnate na etkak teh thupi lo, simtak lo bangin ngaihsun kha ding cin a, ahizong in Pasion leh midangte in tua ci muh lo thei dinguh hi (Matt. 7:1-5)

Mawhna a maisak thei Pasion lo in, koi ah om thei ding i hi hiam? (Heb. 9:27-28). Nang tungah hong khial pa in kisik ing cih hong genna nangawn in maisakna lungsim na lungtang sungah na neih kholh ding ahi hi. Zeisu longal a kicing kuamah om lo hi. Eite khempeuh a diakdiak in kizopnate ah a lawhsamte i hi hi. Mite khialhnate zong lo in a hoihnate zong in: Thanemna a nei mite tungah lungduai in (1Tim. 1:15-17). Thu um mite kikal a kikholh khopna a kisiat leh, a dang mikhat pa khialh cihtak in a khial phial zong in, nasep khiat ding mawhpauakna na nei hi. Pasion in tua bang mite amah tawh dinmunmaan ah a tun kik ding deih hi. Tua hi a, a maute maisakin ngah kik in (Eph. 4:32). "Khat leh khat na kipuakpih un" cihleh, "Mawhmai sak na lungsim nei un" cihte a kihual hi a, tua pen kibang cihna hi (Col. 3:13). Ahizong in tuate pen Zeisu nungzui i hihna ah ama thu a hong zui pah sepkhiatna hilo hi. Hih gamtatna ah lunggulhna tawh sepkhiatna kihel hi. Khazih pum pi (Pawlpi). ah ei le ei mahmah man in i kipia phial zongin kipawl khopna pen lunggulh tak a i teel ding kism hihang.

f) Topa a itte in thupha tampi nei uh hi

Tuate lak ah hite kihel hi.

- Pasion pen citak a, khang tultampi tungah a itna thukhamna keem hi (Deu. 7:9; Exo. 20:6).
- Pasion in amaute nung zuih ding hi (Psa. 23:6).
- Pasion in amaute cing hi (Psa. 145:20).
- Pasion in amaute it hi (Pro. 8:17).
- Amaute nuntak nading ama ngimna bang a sapna leh kalsuanna aneih uh teh nakhempeuh a mute hoih nading in Pasion na sem hi (Rom. 8:28).
- Amah a itte ading in Pasion bawl kholhsa te, mit in mu ngei lo, bil in za ngei nai lo lungsim in ngaihsun ngeina lo hi (1Cor. 2:9).
- Amaute sungah Pasion nungta hi (1Jn. 4:16).

g) Pasion itna i ngahna lampi nga-te.

1. Pasion kiang pan hi-a, i nuntakna sungah ama itna hong guan ciangin (1Thess. 3:12; 2Pet. 1:3).
2. A khangto tehna sungah Pasion i theihna tawh hih pen amah tawh i hunte i zat na tungtawn hi a, thungetna, a thu ngaihna, zonna, leh biakpiakna cihte hi (John 17:26; I John 4:8)
3. Pasion thupiakte i tel khit teh zuihna, manna tawh (John 14:21). Pasion a masa,

midangte a nihna leh ei le ei a tawpna ah i kikoih teh i nuntakna sungah ama itna in na hong sep nading in Pasion ading a pai pi a bawlsak i hi hi.

4. Eite sungah ama itna gahte hong piarsak theihna dinga Khasiangtho tungah i kingakna tawh (Rom. 5:5; Gal. 5:22)
5. Itna bek a deih a, Pasion deihlohte nial ding phawk theihna tawh teelna i bawlna tawh. Itna pen eite ading kingah thei a, eite in la thei, nial thei, a nasem thei, kiphawkmawh bawl thei hihang (Col. 3:12-14; 2Pet. 1:5-9). Lungtang siangtho tawh Topa a sangte tawh kipawl in itna delh in (2Tim. 2:22)

h) Itna pen Tupna Kung hi (Love is the Goal)

Sawltak Paul in ama nasepna ading itna pen a kung in koih hi. 1Tim. 1:3-7 ah Paul in eite nuntakna sungah Pasion itna i lamna ding thu thum i kisapna hong lak hi. A hangbel, Pasion deihna tawh hih thu thumte a kituah keileh, tuate in Pasion itna lonkhia in, Pasion in hong deihsak bang leh eite i kisap bangin Pasion itna ngah theilo hihang. Hih thu thumte pen:-

1. **Lungsim siangtho:** Pasion in amah leh amah hong kipiakna bangin i lungtangte a siantho ding kisam hi. I siantho nading in singlamteh tunga a sisan hong buak Zeisu nasepna pen ei ading in i phattuampih ding kisam hi. I mawhna i pulak nak leh tua sisan luangin Pasion mawhmaisakna leh suksiang na hong ngah sak hi. Eite'n zong midangte i maisak ding kisam hi. Banghang hiam cihleh midangte langkhat ah muhdahnate leh leiba tampite a koih lo mawhna tampi a maisakte dingin Pasion in hong deih hi. Siangthona in kikhel lohna zong gen hi. A ngei banga i om ding kisam a, kuakua tawh hi a, bangbang dinmun ah ahizong in i sepkhiatna a kibang den hi ding hi (1Pet. 1:22; 2Tim. 2:22; Matt. 5:8)
2. **Ngaihsutna hoih:** I ngaihsutna tawh i kilem ding kisam hi. Banghang hiam cihleh hih pen a buai leh, ei le ei in i lamsa gam gi khat kantan khin in mawhna dinmun ah kalsuan hihang. I phawktheihna lungsim pen Pasion phawksakna dak hi in, tua pen a nawngkai teh ei leh Pasion omna ah hangsan tak in hong pai theisak in, i nuntakna ah Pasion itna a mawkna in hong ngah theisak ahihman in, i phawk theihna lungsim pen a siangtho ding kisam hi (1Tim. 1:19; Acts 24:16). I lungsim hong a, i mawhnate hong maisak nading Pasion kiangah i nget ciang Khazih sisan in i phawk theina lungsim hong silsiang in hong siangsak kik ding hi (Heb. 9:14).
3. **A kician upna:** Eite pen upna tawh i nuntak ding ahi hi. "Upna lo tawh Pasion kilungkimsak thei lo hi" (Heb. 11:6). Upna tawh i dinna ding leh upna tawh eite hih theih zahzah a pai thei dingin upna i neih ding kisam hi. Hi bang a i om theih nading in i mihing hih theihnate tungah kinga thei lo hihang. Ei le ei pan in Pasion sungah kalsuan ding kisam hi. Hih pen Pasion ki uk sak ding cihna hi. Hih pen Pasion tungah mawtaw hawlna bek a pia hilo a, a mawtaw buppi mahmah piakna bang dan hi. Tua ciangin ama utna peuh ah suakta tak in pai thei in eite in amah tawh paikhop ziau ding ahi hi. Tua ciang bek in a thupi mahmah itna Pasion in eite sungah hong guan ding hi (Gal. 5:6).

i) Dotnate leh kikupkhopnate

1. Pasion in amah i itna limte a pakta hiam? (Mark 14:3-9).
2. Luk.4 10:25-37 sim in. Nuntak tawntungna i ngah theih nading bang sem ding? I vengte kua hiam? I vengte bangci bawl ding?

3. 1John 4:7-21 sim in Koi pan itna hong pai?
Eite sungah itna in koici bangin hong kicingsak?
Pasian in eite ading a neih itna ah koi ci kingak ding?
Banghang in eite sungah itna kicing?
Itna sungah launa khat peuh a om maw? Banghang?
Pasian it napi, i sanggamte i mudah thei hiam?
4. Pawlpi sung leh leitung ah kizop khop na na behlap theih nading lampite gen in.
5. Pasian in eite ading a Tapa hong pia hi. Ama tungah eite'n phaltak in bang pia thei in ama ading bang nusia thei ding?
6. Banghang in Pasian itna in ama nungzuite nungzuih hiam? (Psa. 23:6)
7. Banghang in itna pen i tupna lianpen hi ding hiam?

j) Tomlakna leh zatpahna

1. Agape itna pen eite ading a Pasian neih itna hi a, ama ading leh midangte ading tua itna i neih ding Pasian in hong deih hi. Hih pen huaiham lo, kipumpiakna leh a kikhel ngeilo itna hi.
2. Itna i neih keileh bangmah lo i hi a, itna lo tawh na i sep leh bangmah meetna i ngah kei hi (1Cor.13:1-3).
3. "A itlo peuh mah in Pasian a thei kei hi. Banghang hiam cihleh Pasian pen Itna hi." (1Jn. 4:8).
4. "Tua ahihman in it luat tate bangin Pasian a ettehte hi un la, Khazih in eite hong it a, eite ading in Pasian tungah a namtui a piak ding leh kithoihnading in amah leh amah a kipiak khiat bang in a nungta itna tawh na nungta un."(Eph.5:1-2).
5. Itna pen a phutna bangin gamtatna tawh kilak hi.
6. Itna pen Khazih pumpi a len cip khawm cement hi.
7. Pasian itna in thupha tampi tungsak hi.
8. "Na khempeuh itna tawh nasem un" (1Cor.16:14).